

दिनांक 16.01.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- सरकार केंद्रीय कर्मचारियों अर पेंशन लेवण वाळां सारू 8वों वेतन आयोग बणावण रो ऐलाण कीनो ।
- मुख्यमंत्री भजनलाल शर्मा कर्मचारी संगठनां ऊं बजट ऊं पैली री बातचीत कीनी—कह्यो—आं रा सुझावां ऊं बजट और समावेशी बणेला ।
- राष्ट्रपति द्रौपदी मुर्मू रो काल राष्ट्रीय खेल पुरस्कार देवण रो कार्यक्रम—राजस्थान री पैरा निशानेबाज मोना अग्रवाल ने अर्जुन पुरस्कार ऊं नवाजी जावेला ।
- राज्य रा घणखर हलकां मांय आवता 4—5 दिन मौसम सूखो रेहवण रा आसार—केई ठोड़ां घणी धुंअर री संभावना ।

000

मंत्रिमंडल केंद्र सरकार रा कर्मचारियों सारू 8वों वेतन आयोग बणावण ने मंजूरी दे दीनी है, जिण री सिफारिशां आवता साल 2026 मांय लागू व्हेला । प्रधानमंत्री नरेन्द्र मोदी री सदरत मांय व्ही मंत्रिमण्डल री मीटिंग पाछे सूचना अर प्रसारण मंत्री अश्विनी वैष्णव आज खबरनवीसां ने आ जाणकारी दीनी । वे बतायो के आयोग रा चेयरमैन अर दो सदस्यां री नियुक्ति करी जावेला ।

.....

वैष्णव बतायो के मंत्रिमंडल साल 2040 ताई चांद ऊं जुड़ी खोजबीन बाबत् 3 हजार 985 करोड़ रुपया रा खर्च वाळा तीजा लांच पैड ने ई मंजूरी दे दीनी ।

000

मुख्यमंत्री भजन लाल शर्मा आज बजट ऊं पैली री बातचीत रा तैत कर्मचारी संगठनां रा नुमाइंदां सागे चर्चा कीनी । ई दौरान मुख्यमंत्री कह्यो के कर्मचारी संगठनां ऊं मिली राय राज्य रा बजट ने और बेहतर बणावण मांय खास भूमिका निभावेला । वे कह्यो के सरकार आं सुझावां माथे विचार कर र वां ने बजट मांय शामिल करण री हरसंभव कोशिश करेला । बातचीत रा अ कार्यक्रम 22 जनवरी ताई चालेला । ध्यानजोग है के 31 जनवरी ऊं सरू व्हे रह्या विधानसभा सत्र रे दौरान माली साल 2025—26 रो बजट पेश कर्यो जावेला ।

000

प्रदेश मांय सरकारी मोल माथे गेहूं री खरीदी 10 मार्च ऊं 30 जून ताई करी जावेला । ई बाबत राज्य सरकार रा पोर्टल माथे 25 जून ताई नाम मंडाया जा सके है । खाद्य अर नागरिक आपूर्ति मंत्री सुमित गोदारा केंद्रीय उपभोक्ता मामलात, खाद्य अर सार्वजनिक वितरण मंत्री प्रल्हाद जोशी सागे वीडियो कॉन्फ्रेंस रे मार्फत व्ही मीटिंग मांय आ जाणकारी दीनी । वे बतायो के गेहूं खरीदी सारू राज्य मांय 259 केंद्र बणायी ज्या है । मीटिंग मांय श्री गोदारा बतायो के राज्य मांय कश्तकारां ऊं

गेहूं खरीदी रो सरकारी मोल 2 हजार 425 रुपया प्रति क्विंटल है। वे बतायो के प्रदेश रा किसानां ने सवा सौ रुपया बोनस समेत 2 हजार 550 रुपया प्रति क्विंटल रा हिसाब ऊं चुकारो कर्यो जावेला।

000

उपराष्ट्रपति जगदीप धनखड़ किसानां री समस्यावां आगी करण रा बारा मांय तुरत ध्यान देवण री जरूरत माथे जोर दीनो है। वे आज कर्नाटक रा धारवाड़ मांय कृषि विज्ञान विश्वविद्यालय रा कार्यक्रम मांय बोल रह्या हा। धनखड़ कह्यो के सगळां ने मिल र किसानां री समस्यावां दूर करण बाबत् सकारात्मक सोच सागे काम करणो चाहिजे। वे हल्दी बोर्ड बणावण री सराहवणा करता थकां कह्यो के सरकार ने इण ई भांत और बोर्ड बणावणा चाहिजे ताकि साखां रा मोल मांय बधोतरी रो फायदो मिल सके। वे किसानां ऊं खेती-बाड़ी रा काम मांय प्रौद्योगिकी बत्ती ऊं काम लेवण री अपील कीनी।

000

लोकसभा अध्यक्ष ओम बिरला आज कोटा मांय “स्टूडेंट कनेक्ट” कार्यक्रम री सरुआत कीनी। ई रा तैत विद्यार्थी अब स्कूल अर कॉलेज मांय ई पासपोर्ट बणवा सकेला। ई मौके खबरनवीसां सागे बातचीत करता थकां श्री बिरला कह्यो के ई सेवा ऊं हाड़ौती अंचल री जनता ने फायदो मिलेला।

000

.....

राष्ट्रपति द्रौपदी मुर्मू रो काल बेहतरीन खिलाड़ियां ने राष्ट्रीय खेल पुरस्कार 2024 दे र नवाज़ण रो कार्यक्रम है। राष्ट्रपति भवन मांय राख्या जावण वाळा जळसा मांय विश्व शतरंज चैंपियन डी गुकेश, ओलम्पिक खेलां मांय तमगा जीतण वाळी निशानेबाज मनु भाकर, भारत री हॉकी टीम रा कप्तान हरमनप्रीत सिंह अर पेरिस पैरालिम्पिक मांय सोना रो तमगो जीतण वाळा प्रवीण कुमार ने मेजर ध्यानचंद खेल रत्न पुरस्कार दिया जावेला। ई सागे ई 32 खिलाड़ियां ने अर्जुन पुरस्कार ऊं नवाज़ा जावेला। आं मांय राजस्थान री पैरा शूटर मोना अग्रवाल ई शामिल है। मोना पेरिस पैरालिम्पिक मांय दस मीटर एयर राइफल स्टैंडिंग एसएच-1 निशानेबाजी होड़ मांय कांसा रो तमगो जीत्यो हो।

000

स्टार्टअप इंडिया अभियान री आज नौवीं वर्षगांठ है। ई मौके राज्य मांय ई न्यारा-न्यारा कार्यक्रम राख्यी ज्या। पाली रा सरकारी बांगड़ कॉलेज रा स्टार्टअप प्रशिक्षण केन्द्र मांय विद्यार्थियां सारु होड़ राख्यी ज्यी अर स्टार्टअप सरु करण रा गुर बतायी ज्या। कोटपूतली-बहरोड़ रा बानसूर मांय राख्यी ज्या कार्यक्रम मांय नौजवानां ने कौशल विकास रा बारा मांय जाणकारी दीरीजी। ई मौके मुख्यमंत्री भजनलाल शर्मा सोशल मीडिया पोस्ट रे जरिये कह्यो के ई योजना ऊं प्रदेश मांय ई उद्यमशीलता रो नुवो दौर सरु व्ह्यो है।

000

राज्य रा घणखर हलकां मांय आवता 4-5 दिन मौसम सूखो रेहवण रा आसार है, हालांकि कोटा, अजमेर, जयपुर, भरतपुर अर बीकानेर संभाग रा कुछ हलकां मांय आवता दो-तीन दिन घणी धुंअर रेहवण री संभावना है। मौसम केन्द्र जयपुर रे मुजब कोहरा रे कारण कठे-कठे दिन री बगत पारो 2 ऊं 4 डिग्री सेल्सियस ताई उतर सके है। ई बीचे, राज्य मांय सब ऊं कम 3 दशमलव 7 डिग्री सेल्सियस न्यूनतम तापमान नागौर मांय दर्ज करी ज्यो। म्हाणा खबरनवीस बतायो के ज़ोरदार ठारी ऊं जिन्दगी माथे असर पड़ रह्यो है।

.....

फतेहपुर शेखावाटी मांय 5 दशमलव 4, अलवर मांय 5 दशमलव 8, अजमेर मांय 6 दशमलव 2, सीकर अर जैसलमेर मांय 6 दशमलव 7 अर राजधानी जयपुर मांय न्यूनतम तापमान 10 दशमलव 6 डिग्री सेल्सियस दर्ज करी ज्यो।

000

जयपुर इंटरनेशनल फिल्म फेस्टिवल—जिफ काल सुरू व्हेला। जयपुर रा राजस्थान इंटरनेशनल सेंटर मांय व्हेवण वाळा जळसा मांय देश—परदेश रा फिल्म उद्योग ऊं जुड्या 400 ऊं बत्ता दिग्गज शिरकत करेला।

.....

प्रयागराज मांय चाल रह्या महाकुंभ रा तैत आज गंगा पंडाल मांय सांस्कृतिक कार्यक्रम **“संस्कृति का महाकुंभ”** राख्यो जा रह्यो है। इण मांय नामी कलाकार सोहवणा कार्यक्रम पेश कर र भारत री संस्कृति री समृद्ध परम्परा रो दरसाव कर रह्या है। यमुना अर सरस्वती पंडालां मांय ई सांस्कृतिक कार्यक्रम राख्या जा रह्या है। महाकुंभ संस्कृति अर आध्यात्मिकता सागे पर्यावरण ने बचावण री ई पिछाण बण रह्यो है। 31 जनवरी ने हरित महाकुंभ राख्यो जावेला। ई बीचे प्रदेश री जनता री महाकुंभ ताई पहुंच आसाण बणावण सारू रेलवे अर रोड़वेज री ओर ऊं खास व्यवस्थावां करी ज्यी है। रोड़वेज री ओर ऊं 12 जनवरी ऊं कुम्भ स्पेशल बसां चलायी जा रही है, जदके रेलवे ई काल ऊं कोटा कने सोगरिया ऊं बनारस ताई खास गाड़ी चलावेला। 22 फरवरी ताई चालण वाळी आ गाड़ी सप्ताह मांय दो दिन शुक्रवार अर मंगलवार ने जावेला। सोगरिया ऊं आ गाड़ी काल संवारे सवा आठ बज्यां रवाना व्हेला। कुम्भ ने ध्यान राखता थकां 19 जनवरी ऊं एक और गाड़ी बाड़मेर ऊं बरौनी बीचे चलाई जावेला। इण ऊं पैली आज जयपुर ऊं साबरमती बनारस स्पेशल रेलगाड़ी रवाना व्ही।